

四庫全書

史部

欽定四庫全書

世宗憲皇帝上諭八旗卷八

雍正八年正月二十七日兵部為署副都統鼐格馬拉員缺帶領護軍叅領桑格等八人引

見奉

上諭鼐格之缺著代通署理馬拉之缺著英壽署理凡署理副都統事務之叅領若仍令辦理叅領任內事務一應行走之處悉屬不便將此諭八旗都統等凡署理副

都統事務之叅領員缺著揀選副叅領奏請署理其副
叅領員缺亦著揀選應行署理之員奏請署理特諭

雍正八年二月初三日奉

上諭

景陵寶城山上首春產瑞芝三本諸王大臣等奏稱為朕純
孝之所感召朕撫躬自問生平事我

皇考不敢當純孝之名但誠敬之心數十年如一日此則可
以自信自御極以來不但一言一事仰體

聖心而後見諸施行即夢寐之中一念舉發從無有知其不合

聖意而敢存於胸臆者諸王大臣等稱朕以

皇考之心為心此實朕之惓忱至云朕以

皇考之政為政朕之才力遠不逮我

皇考舉凡宣猷敷治之間雖黽勉效法究不能企及於萬一

何能致芝草之嘉祥諸臣以此歸美於朕朕不居也實

因我

皇考之聖德神功蟠天際地深仁渥澤積厚流光

上天特欲顯示天下臣民是以數年之中三見芝英於

陵寢以今之厯霜雪而挺生當首春而呈瑞稽諸史冊更屬

罕聞朕感

上天昭示之弘恩叨

皇考貽謀之景福慶幸歡欣不敢不宣布於衆庶使天下後

世臣民知

上天之眷佑

皇考與

皇考之垂裕萬年者即瑞芝一事明顯昭著信而有徵固如是也著照所請宣付史館特諭

雍正八年二月十七日奉

上諭從來察吏之道莫先於獎廉懲貪蓋貪黷之風不息則上虧國課下剥民膏其為吏治人心之害者甚大不止關係錢糧而已我

皇考聖祖仁皇帝澄敘官方深惡貪墨之蠹國病民所以警

戒訓飭之者至矣祇以

聖心寬大慈祥未曾將侵蝕國帑貪取民財之人置之重典姑且包涵望其徐徐感化此實如天之仁也乃不肖官員等不但不知感激悛改勉為廉吏且恃有寬大之恩心無畏懼將侵盜貪墨視為固然數十年來日積月累虧空婪贓之案不可勝數朕若不再加懲治仍容此等貪官污吏擁厚資以長子孫則將來天下有司皆以侵課納賄為得計其流弊何所底止是以數年來朕加意

整頓以冀轉移恃恩積玩之風若果人心知儆舊習漸除令朕可以施寬大之政乃朕之至願也此意係朕於元年二年間即屢向左右大臣等密言之者今觀各省吏治雖未必能徹底澄清而公然貪贓犯法及侵盜錢糧者亦覺甚少是衆人悛改之象與朕期望之意相符不至於不可化誨亦可以遂朕寬宥之初心矣今欲大沛恩膏將遠年承追之項酌量豁免將各直省官員名下應追贓銀及侵欺那移流抵分賠代賠等項銀兩事

在雍正三年以前已經發覺者該部查出將各案情由明白開註候朕酌其情罪降旨免追其自雍正四年正月以後各員犯罪之案乃朕屢經訓諭而不悛改者不准寬免至於軍務錢糧關係重大其昔年西寧肅州阿爾泰軍需等案內應追銀兩雖在雍正三年以前亦不准豁免此次特恩乃朕仰體

聖祖仁皇帝寬大至意爰施法外之仁豈但本人及其子孫免追比之苦獲再生之慶當銘心刻骨感愧交深即承

追之地方在官員則得免於處分在胥吏亦得免於杖責案牘減省事簡刑清莫不受國家寬大之賜咸當感激警省互相勸勉以循良為楷模以貪墨為鑒戒則大小官吏永遠共沐國恩倘因逾格寬宥轉啟玩法之心復蹈從前之轍則曠典豈可再邀國憲豈能再免且背天逆理莫此為甚亦斷不能逃

上天之譴責也特諭

雍正八年二月二十九日奉

上諭嗣後凡二三衙門會議會審之事或由一處已經行
催而他處尚未辦理者著已經行催之衙門即繕摺奏
聞雖經行催不行具奏日後若因遲延治罪仍將此不
行具奏之衙門一併議處如奏聞之後以為已經具奏
日後縱有遲延與已無涉仍將事件依然遲延者亦將
此衙門之大臣等一併議處將此通行曉諭八旗及各
部院特諭

雍正八年二月二十九日奉

上諭內外官員人等遠年拖欠之項朕已降旨凡事在雍正三年以前者俱著查明具奏候朕酌其情罪施恩豁免若事在三年以後乃朕屢經訓諭而不悛改者不准寬免所降諭旨甚明昨正白旗漢軍都統祖秉衡因伊父昔年借欠羅姓銀兩羅姓虧空應著落祖秉衡等代為還項奏請以房屋抵補並坐扣俸銀朕諭以此係年遠之事應在查免之列何必如此陳奏祖秉衡奏稱雖係年遠之事而發覺在雍正三年以後不應邀查免之

恩等語朕將今年二月十七日所降諭旨復行查閱其中有事在雍正三年以前已經發覺字樣此乃言事在三年以前而現今已經發覺者並非言三年以前發覺之案始准寬免也該旗既錯會朕旨則內外各衙門或亦不甚明晰亦未可知著再行宣諭凡事在三年以前而發覺在今年二月十七日未奉旨之先者俱准查奏特諭

雍正八年三月初一日

上諭朕愛惜人才不忍聽其限於考成遂至放廢而外任各官案件繁多往往罹於叅罰是以數年來因公註誤之員例應降革者多於覆本之內降旨令該上司出具考語送部引見若其才具稍有可用必再試以職任而成全之雖片善寸長亦不肯輕棄也今思在京部院司官及旗員等雖叅罰之案不多然亦有因公註誤者所當一體加恩與以贖過自新之路嗣後在京文武各員有因公註誤至於降革而任內無錢糧不清及治罪之

案者准照外員之例令該堂官該旗大臣出具考語奏聞帶領引見或將該員仍留原任或另行試用或照例降革候朕降旨裁奪特諭

雍正八年三月初四日奉

上諭八旗輪班當月之處著察旗叅領侍衛等稽察如鑲黃旗當月著正黃旗察旗叅領侍衛等稽察其七旗俱照此例以次稽察特諭

雍正八年三月初九日奉

上諭嗣後凡有應派委驍騎營官兵看守之處俱著奏聞再令看守若應行看守之處有不可稍緩者即派令看守再行具奏將此通行傳諭特諭

雍正八年三月初十日兵部將江寧駐防鑲紅旗協領騷達子具呈辭職之處具奏奉

上諭凡在京年老辭職之旗員內有在行間効力年久者於辭職具奏之日朕悉閱看有應加恩者朕即加以恩施嗣後各省駐防處官員內有在行間効力年久之人

因年老辭職具呈者著該將軍等於具奏之時將伊食俸餉之年及在行間効力行走之處聲明咨送兵部奏聞候朕閱看有應加恩者加以恩施現今因老辭職之鑲紅旗協領騷達子亦屬武職內効力之員著以原品休致給以半俸終身該部知道特諭

雍正八年三月十一日奉

上諭朕前降旨豁免雍正三年以前拖欠銀兩著該部該旗陸續查奏請旨其查明者即先行奏聞冊內將該員

拖欠情節及有罪無罪之處其銀已完若干拖欠若干
一一詳細開明再開一簡便單夾入各員冊內以便披
覽若該員有先後兩案一案應免一案不應免其不應
免者不必開入冊單之內著即傳諭該部該旗知道特
諭

雍正八年三月二十三日奉

上諭午門外朝房之南科房之北有碑亭一所供奉

皇考聖祖仁皇帝御製臺省箴碑文理宜恭敬嚴肅洒掃潔

淨以昭儼恪之誠聞朝會之期各官齊集於未坐班之
先往往列坐碑亭之內談笑喧譁箕踞傲慢又或書吏
奴僕等抱牘跟隨任意出入無人禁止甚為不敬查此
地與六科相近即著六科輪班撥人守護每日掃除潔
淨虔謹啟閉倘官吏人等仍敢擅入視為憩息之所著
輪班之科衙門即行叅奏如科員不行查叅經朕訪聞
定行交部察議其碑亭建立已久如有應行修理之處
著工部查勘奏聞敬謹修理特諭

雍正八年三月二十三日奉

上諭邇來因未雨之故深厯朕懷昨山陝等省俱報雨水
沾足直隸保定府等處亦皆得雨惟京畿附近之地尚
未獲有甘霖反覆自思朕於政治之間或有所闕失但
朕夙夜恭虔敬

天勤民之念未敢少懈一切政事孜孜勤勉未嘗暫弛其無
闕失之處朕躬可以自保頃將虧空錢糧人員豁免自
降旨之日即為起風由此觀之意必此等貪劣之人不

知厭足反謂何不於元年豁免至今始行降旨不感恩
施妄行怨望之所致也若朕從前政治果有闕失何以
數年來雨水調勻一應米穀俱獲大有第此等虧空人
員俱係盜竊國帑擾害生民實獲

上天之譴今朕加以寬免者或於

上天之意有所未合乎將此遍諭八旗俾無知之人洗心悛
改倘伊等若不知感戴恩施仍行怨望朕惟有始終執
法辦理而已特諭

雍正八年三月二十五日奉

上諭朕因京城雨澤愆期撫躬自問近日用人行政仍是從前敬慎之心即諸大臣等亦黽勉奉公各盡職守倘有過愆朕即諭令悛改並無上干

天和之處惟有今年二月內頒發查免積欠之諭旨必有無知作孽之人不惟不知感激朕高厚之恩或以未曾早降恩免之旨轉生怨望以此乖戾之氣上干

天和是以

上天垂象於京城之內此朕靜心體察知之甚確者於二十三日八旗大臣引見官員時朕面降諭旨將宵小邪曲之心

上天示儆之意一一指出切為訓誡令各旗大臣概行曉諭諭旨甫下二十五日早隨降時雨四郊沾足天人感應之道呼吸相通垂象昭明可敬可慎如此凡無知之人益當悚惕修省以凜

天鑒特諭

雍正八年四月初十日副都統徐仁將八旗武職官員於朝會處並不佩刀令家人攜持之處具奏奉

上諭徐仁所奏甚是官員兵丁佩刀乃係定制凡朝會之處理應佩刀行走既係武職乃以刀劍為重贅之物庸於佩帶令家人代為攜持甚屬非理此皆由該管人員漫不經心不行教誨之所致也嗣後應帶刀之官員兵丁人等凡朝會及行走之處俱令佩刀若有仍不佩刀交令家人攜持者著步軍營官兵即行查拏八旗稽察

旗務之叅領侍衛御史管兵大臣等亦行查拏係官即行叅奏係兵交與該管大臣等責處將此通行曉諭八旗官員兵丁人等知之特諭

雍正八年四月十四日因副都統劉汝霖條奏漢軍人等打步圍一事

召入旗下大臣等奉

上諭步行較獵甚為善事人人既得學習而於行圍之道亦得嫻熟爾等每年與其較獵一次不若多演數次為

善嗣後於初冬行步圍時每一旗令行圍二三次其行圍之時著各該旗大臣親身帶往於前一日須奏聞每圍派侍衛打牲人鷹上人或二十名或三十名亦著前往如此則侍衛執事人等既得學習而兵丁等亦得嫻熟行圍之道矣特諭

雍正八年四月十四日奉

上諭大小官員頂帽補服坐褥等項各宜遵照現任品級不得僭越從前已降諭旨後因御史等查奏文武官員

內有補服與帽頂不相符者朕又降旨帽頂等項各按
本身品級不得計算加級所頒諭旨甚明近聞文武官
員仍有越制擅用者及該管官員查問時則引從前准
算加級之例掩飾支吾甚屬不合嗣後內外文武大小
官員帽頂補服坐褥等項悉照本身現任品級不得指
稱加級以開僭越之端在京著有稽查之責者嚴行稽
查在外著該管上司稽查倘仍復不遵除將本人議處
外其失察之員一併處分特諭

雍正八年四月二十一日奉

上諭朕澄清吏治整飭官方時時訓勉大小臣工實心供職以熙庶績而惠兆民又恐職官甚多優劣不等或視告誡為具文不知儆惕是以遇有叅處之案率按例處分不稍寬貸蓋欲其謹小慎微時時檢束則自不至於踰閑蕩檢干犯重罰也而外省督撫等亦皆遵奉法紀察吏嚴肅不肯寬假從容內外之考課如此無非察吏安民懲貪勸善之意並非苛刻以待臣下也近年以來

朕留心體察内外文武大小官員不敢言盡皆大法小廉而奉公守法各勤職業者多官箴共知謹凜朕心深為嘉悅而從前叅罰之案積累漸多擬於今歲秋冬之間開恩寬免以示獎勵曾向大臣等言之今者京師雨澤愆期朕虔加修省並推求政事之闕失而不得其由因思朕原有寬免各官叅罰之心而未曾降旨或者内外數百人員之中罰當其罪者固多而限於成例情有可原者諒亦不少應即頒諭旨廣沛恩膏咸予以自新

遷善之路除特旨永停俸祿者不行開復外著將內外
滿漢文武大小官員一應革職降級留任及罰俸停陞
之案悉行寬免准其開復倘此降革人員開復之後將
來有犯貪贓侵蝕不法重罪者著於本內聲明具奏特
諭

雍正八年五月初七日奉

上諭朕因怡親王仙逝中心悲慟雖強自排遣而飲食俱
覺無味寢卧皆不能安蓋王之事朕誠敬忠愛之心八

年有如一自古代以來無此公忠體國之賢王則朕所以待王之禮亦應在常例之外今朕素服一月以稍展思慕不釋之情此一月之內朕既素服則在廷諸臣遇朝服之期亦著仍穿常服一切宴會俱不必行凡朕加恩於王之處皆不足以酬王之碩德豐功而在朝之諸王大臣官員等受國家之恩必念國家失此賢王同深悲痛但其中胸懷妬嫉之心天良盡泯之輩或本屬儉邪之人意欲肆志妄行又不然則冥頑無知賢奸莫辨

者皆不足與論也昨日朕親臨奠之時見滿漢文武諸臣悲切之狀人有同情朕心甚慰益見王之素行感人者深也特諭

雍正八年五月初九日奉

上諭怡親王忠孝性成端方清直當年事我

聖祖皇考敬謹恪恭克盡子臣之道深蒙

皇考慈愛而王慎密有加小心安分此中外所共知者逮朕御極之初命王總理事務王夙夜匪懈公爾忘私精白

一心無欺無隱其殫竭忠誠贊襄於密勿之地者八年有如一日至於軍務機宜度支出納興修水利督領禁軍凡營中府中事無鉅細皆王一人經畫料理無不精詳妥協符合朕心無煩朕之指示其有關於吏治民生之利弊有聞必奏每語必詳而為國家保護善類培養人材一片篤摯真切之念形於寤寐王之懿德美行從不欲表著於人而人亦無從盡知之朕即知王最深而亦口不能宣筆不能述也是以雍正四年特書忠敬誠

直勤慎廉明八字以賜比時降旨朕深知王之德洞悉
王之心覺此八字實不能盡王之美善不過就王事朕
之大端而言耳蓋王實能佐朕治安天下朕實賴王翼
贊昇平徧觀自古史冊所載賢王懿戚從未有可與王
比倫者且王居心之和平公正行事之寬厚仁慈皆足
以享遐齡而綿壽算豈意王遽舍朕而溘然長逝耶自
去年冬月王抱病以來朕縈繫於懷無刻稍釋尚確醫
藥默禱

神祇以冀沉疴頓起乃令醫藥罔效祈禱不靈豈朕有獲罪於

上天

皇考之處而奪我忠誠輔弼之賢王若此之速耶王抱恙時居住交暉園與圓明園相近朕間欲親往看視王再三懇辭而於一旬半月之間必力疾入圓明園與朕相見及王病勢漸加力不能支惟恐朕心憂煩則稱交暉園乃起病之所暫且移避遂養疾於西山無非欲與圓明

園相遠令朕不深悉其病狀可以安慰朕心也及王回城中府第朕以祈雨回宮前月得雨之後王屢次奏請朕幸圓明園是王但恐以病狀煩勞朕心而於已身之生死全不計及也及聞病勢沉篤朕方欲命駕臨視乃王聞知即脫塵而去蓋王不欲以永訣傷朕之懷是以顯此剛決之相其於去留之際明白超脫若此在王成一忠孝正直賢智慧覺之全人而朕頓失此柱石賢弟感痛悲哀何能自己耶王之德行功績難以枚舉即如

輔政之初阿其那包藏禍心擾亂國是隆科多作威作福攬勢招權實賴王一人挺然獨立於其中鎮靜剛方之氣俾奸宄不得肆其志又如青海背叛之時年羹堯領兵進勦而隆科多以私怨年羹堯之故百計阻撓不顧軍國之重務王在朕前力言此番軍旅之事既已委任年羹堯應聽其得盡專閫之道方能迅奏膚功朕從王言而隆科多不能從中掣肘於是青海旋即蕩平又如果親王在

皇考時朕不知其居心聞其亦被阿其那等引誘入黨及朕御極後隆科多奏云

聖祖皇帝賓天之日臣先回京城果親王在內值班聞大事出與臣遇於西直門大街告以聖上紹登大位之言果親王神色乖張有類瘋狂聞其奔回邸第並未在宮迎駕伺候等語朕聞之甚為疑訝是以差往

陵寢處暫住以遠之怡親王在朕前極稱果親王居心端方乃忠君親上深明大義之人力為保奏朕因王言特加

任用果親王之和平歷練臨事通達雖不及怡親王而公忠為國誠敬不欺之忱皎然可夫天日是朕之任用果親王者實賴王之陳奏也似此密陳補助為廷臣所不知者甚多王之功在

社稷者大矣從來豐勳偉烈必膺國家崇報之典惟王為聖祖皇考之令子為我朝

列祖之功臣允宜配享

太廟列於從前建立大功諸王之次庶與王之功德相副且

可上慰

列祖

皇考在天之心而朕思念悲切之衷亦可稍解於萬一其餘一切恩卹典禮該部會同大學士九卿悉心詳察從優定議具奏特諭

雍正八年五月初十日奉

上諭今年春夏以來屢沛蠲免寬卹之政中外臣民皆以爲沐朕浩蕩之恩而不知朕施恩之所自朕之接待天

下臣庶朗然如青天白日無不可以共知共見之隱微
況怡親王不幸仙逝朕追思其美善尤不忍不以朕之
本心明白宣諭使衆共知之朕御極之初命怡親王管
理戶部事務朕知戶部庫帑虧缺甚多令王清查辦理
王奏云此項虧空歷年已久清查之後必求皇上開恩
寬免比時朕姑應之及王遵旨查出虧空之項至於二
百五十餘萬兩之多王奏請以將來餘平飯銀陸續代
為完補朕以歷年該管官員侵蝕國帑藐視國憲若不

責令賠補何以謹度支而清弊實於是飭令開報著追
未從王之請王始而變色後即遵旨悉心辦理是以中
外之人但知戶部多年虧項自怡親王查出甚至無識
小人有謂王過於搜求者而不知王之請免追究請為
代完幾番陳奏之苦心若斯之懇切也數年以來在各
該員名下追出者不及十分之一二而怡親王以餘平
飯銀代為完補者則已十之八九然則各員之應完而
不完者其銀豈可免乎其罪尚可貸乎今春朕見怡親

王抱恙未痊因思王從前懇切陳奏之意特降諭旨將各員未完銀兩概行免追以遂王之初願一日朕向王言之王悚惕不寧曰此皇上寬大之恩非臣所敢冀望者此戶部庫項之始末朕不忍不宣播於衆者也王曾奏稱皇上用法稍覺嚴厲朕語之曰人心玩愒已久百弊叢生此時若不懲創將來無所底止蓋朕雖未即從王之言而王一片寬厚忠直之意未嘗一日不在朕心也近見貪贓侵帑作奸犯科之風漸次止息吏治漸次

肅清因思王言特沛恩膏將雍正三年以前各直省官員名下應追銀兩令該部查出請旨豁免三月間王來見朕朕語以施恩豁免之意王對曰此皇上如天之仁宸衷獨斷若云出自臣奏臣萬不敢居也朕意欲俟秋冬之間將內外大小文武官員叅罰各案悉行寬免准其開復此意亦曾向大臣等言之適因京師四月雨澤愆期朕齋心虔禱之餘遂頒寬免開復之旨庶幾集中外之歡心以感

天和而施甘澍果蒙

天降時雨四野均沾凡此數事皆朕念王之忠從王之言而布此寬大之典也王一生為國為民濟人利物之事不可枚舉常存惟恐人知之念若朕偶一宣露則王之惶悚不可名狀是以王在生之日朕不肯違拂其意以此揚播於衆今王仙逝矣若朕仍秘而不宣則內外臣民隱被王之厚德而莫知其由是朕泯王之善也此心何以自安據天理本良朕實難於隱忍況王之懿美多端

筆不能述姑就此言其大概耳特諭

雍正八年五月初十日大學士九卿等奉

上諭茲因怡親王之事朕心悲戚爾等請朕節哀再三陳
懇朕每事愛惜精神不肖為勉強之舉時時以此訓諭
臣工豈至今日而遂忘之耶但於怡親王之慟出於朕
之至情實有不能自己蓋以王之事朕一片忠赤之心
至誠至敬不但自古以來無此賢王即史冊所載名臣
良佐輝耀簡編者恐亦未能如王之毫髮無遺憾也正

之年齒小朕八歲不但賴王贊襄朕躬且望王輔弼於將來為擎天之柱石立周公之事業使我國家受無疆之福此實朕之本懷豈料王竟舍我而長逝耶爾諸臣試思之君臣之間求如王之與朕同心同德無欺無隱者豈可再得何能遣朕心之悲耶王顯名厚德為宇宙之全人垂休光於竹帛固不以壽算之修短計而國家失此股肱心膂之賢王在朕躬則甚苦矣因廷臣等請安奏懇畧將朕意宣諭知之特諭

雍正八年五月十一日奉

上諭自朕御極以來怡親王輔弼贊襄嘉猷不可悉數此皆廷臣所不能知而朕亦難臚列以宣示中外者即其公正持身溫和不處衆端方率屬慈厚待人為宗室之楷模樹百官之坊表同事者悉受成全教導之功聞風者咸切觀感奮興之念此王之裨益於人心世道顯而可見者也崇德報功國有令典懷恩慕義人有同情凡茲文武官員平日受王之教訓知王之美善者或以未奉

諭旨不敢遽詣王府致奠申哀以致悲慟之忱莫由自達非所以昭秉彝之好慰尚德之公也用是特頒此旨若在京各官等有欲叩奠王之几筵或撰製文詞以紀功述德自陳悃悃者俱准其前往若外省督撫等有欲致奠於王府者准其遣官或子弟代行仍令具本奏聞其不深知王之居心行事者不必朕亦不强之也若稍有心行相違則為欺

天誑朕之舉矣更可不必特諭

雍正八年五月十九日奉

上諭怡親王為朕辦理大小諸務無不用心周到而於營度將來吉地一事甚為竭力殫心從前在九鳳朝陽山經畫有年後因其地未為全美復於易州泰寧山太平峪周詳相度得一上吉之地王往來審視備極辛勤又恐隨從人等煩擾居民將飲饌之屬俱不令前驅預備常至昏夜始進一餐其所擇吉壤實由王親自相度而得者而臣工之精地理者詳加斟酌謀僉同且以為

此皆王忠赤之心感格神明是以具此慧眼卓識也其相近山水迴環形勢聯絡之處又有中吉次吉之地朕以王經營吉地實為首功欲以中吉者賜之王驚悚變色奏曰此等吉壤必有大福者乃足當之若臣冒昧得此不惟不能蒙福子孫必罹禍殃惶懼固辭尚有不便明諭激切之辭朕鑒其誠心遂暫寢其事已而在六十里外涑水縣境內得一平善之地曰此庶幾臣下可用者奏請賜給朕比時遲回未曾降旨王於病中令侍郎

劉聲芳懇切轉奏朕不得已允其所請王得旨喜極至
於踴躍忭舞云皇上待我隆恩異數不可枚舉今茲恩
賜則子孫世世俱受皇上之福於綿長矣即日遣護衛
前往起土越數日護衛呈看土色王取一塊捧而吞之
蓋王知朕眷王之深惟恐瑩域未定將來仍以前所欲
賜之地賜之也其用心之謙謹周密至於如此王仙逝
後朕詢問王府管事之人知王病中將身後之事一一
指示特畫親王墳塋圖一幅與其福金及諸子曰我身

後塋地之制悉照會典所載親王之禮行毋得稍有踰越如或稍過則汝等違我之治命矣即非我之妻子也昨王府之人以圖進呈朕覽僅有門三間享堂五間此國家經常之制非所以待有大功之賢王者但思王之生平謙抑退讓朕每加恩禮王必再四懇辭朕鑒其一實皆出於至誠往往俞允今若身後獨不從其言朕心有所不忍然以豐功碩德不世出之賢王而寢園僅循常制則褒德顯功之典禮實為缺畧朕心又有所不

忍昔顏子死門人厚葬之子曰非我也夫二三子也在
夫子深知顏子之心故以未從其志為憾而先王緣人
情以制禮則厚葬之舉豈非情之所難已即為禮之所
可行者歟今如何使朕心之輟轉不忍者得以大慰而
揣度王心亦受之而安且揆之於禮適為合宜允協著
大學士九卿等悉心詳酌定議具奏特諭

雍正八年五月二十日諸王滿漢文武大臣請

安

上御正大光明殿

召入

面諭曰怡親王不幸仙逝朕為國家痛惜失此賢王為朕躬痛惜失此賢弟五內悲切自不待言若云因悲感太過至於有傷身體朕必不為也朕自去年冬即稍覺違和疎忽未曾留心調治自今年三月以來間日時發寒熱往來飲食不似平時夜間不能熟寢如此者兩月有餘矣及五月初四日怡親王事出朕親臨其喪發抒哀

痛之情次日留心試察覺體中從前不適之狀一一解退今則漸次如常矣舉朝王公大臣心存忠愛惟恐朕以沉痛而傷襟抱者固多而包藏禍心如滿都護輩者謂朕必過於悲哀而妄冀慶幸者亦未必無人即如從前八阿哥之事彼儉邪小人之意中亦必以為朕心之痛至於不可解矣豈知朕衷自有主見安肯效庸衆之人為無益之悲耶但八阿哥之事乃朕父子之私情小節可以即時擺脫不使縈繫於懷而怡親王之事則

金史卷八
卷八
有不同者王之隱德豐功待朕宣舉王之嘉言懿行待朕表章國家崇報之典不可不隆人心彛好之公不可不慰朕悉心經理不免觸緒增悲而無知之人見此情景遂以為朕心憂傷太過以致面色清減爾等試思之昔年遭值

皇考

皇妣大故朕思罔極之恩寸心如割一日之間常痛哭數十次三載無間此大小臣工之所共知共覩者比時竊念

皇考付託之重

宗社攸關不敢違古人滅性之戒皆量朕力之所能而為之者蓋悲出於誠不為絲毫勉強偽飾未有傷身之理也若今日因我弟之痛而至於有傷朕躬則輕重倒置莫此為甚朕豈為之耶且吾弟在日但知有朕躬而不知其身朕若不體其意則吾弟之仙靈不知如何之憂戚靡寧矣朕更不肯為之也況兇惡不法之輩未嘗無冀幸之心朕又豈肯失於節制以遂小人大逆之願耶夫

壽莫之修短乃一定之數惟令名垂於無窮斯為不朽
吾弟在日立身行已為國為民大節細行之間無幾微
之遺憾今茲身後仰蒙

上天

皇考之嘉佑顯示景象如此而人心愛戴追思至於吞聲飲
泣異口同聲又如此是吾弟之功在

社稷名耀簡編者千古為昭朕惟有以手加額感激

上天篤生此不世出之賢王為我邦家之光於悲戚之中轉

為慶幸朕心實是如此因爾等齊集請安特面諭知之
雍正八年五月二十一日奉

上諭自怡親王輔佐朕躬以來八年之中凡朕加恩於王
及遣王代祭行禮或慶賀生辰或遷移府第錫賚筵宴
之日天氣必暄和晴朗事事如意此朕留心體察無一
爽者從前深幸

上天

皇考以朕之加恩於王為是以顯此景象雍正四年十月

行冊封之禮此日更為昭著朕亦每將此等情由屢次
宣諭諸王大臣今王仙逝發引之前前二日微雨灑塵
至本日天色清明和霽並無炎蒸暑熱之氣但覺涼爽
宜人從來五月間罕遇此氣候

上天

皇考之福佑我賢王不更彰明較著哉至於送殯之人凡在
王屬下者無不感恩悲切痛哭失聲而宗室王公人等
及舉朝文武大臣官員皆遵例步送數十里盡哀盡誠

出於自然之本良無一人覺勞倦者兵丁耆度皆俯伏
道旁焚香泣拜即婦人孺子亦無不口稱賢王歎歎歎
息此等人情纏綿肫摯不約而同身後之思又非感激
頌禱於生前者可比此豈人力之所能强者哉是王雖
仙逝而王之美善入於人心聲名垂於史冊者千載如
新古今罕匹朕因

天道人情如此為王慶慰稍解悲戚之情特諭諸王大臣等
知之

雍正八年五月二十六日奉

上諭禮記曰聖王之制祭祀也法施於民則祀之以勞定國則祀之能禦大災大患則祀之此崇德報功之典千古不易者而人心懿好之公感恩戴德永慕追思有功於一郡則一郡祀之有功於一鄉則一鄉祀之此又緣人情而制禮自古及今名賢碩彥享俎豆而奉蒸嘗者不可勝數然其功德未必盡如吾弟怡親王之大且深也王忠孝兩全智仁兼備嘉謨經國渥澤安民其美難

以救舉試舉其功在

社稷之大端而言之從古帝王之治天下理財與用人並重
蓋必國用充足然後可以加惠於民王自總理戶部以
來謹領度支均平貢賦月要歲會令肅風清無弊不除
無患不舉如江南江西浙江之浮糧乃

皇考多年欲行裁減而格於部議者王則體

皇考愛民恤下之心佐朕減賦賜租之政悉心經畫奏請蠲
除俾民力寬紓催科不擾此王之功德及於三省者也

又如戶部庫帑累年虧空至二百五十萬之多王則經理多方代為彌補使各官脫然無累子孫並免追賠此王之功德及於衆姓者也又如朕因怡親王之奏而蠲免多年之逋欠寬宥各官之處分此王之功德及於天下者也又如府庫充盈儲蓄完備是以軍需所用至逾千萬皆取之帑藏而裕如一絲一粟無煩小民之供億此王之功德顯著於軍國而隱被於蒼生者也又如擲風沐雨冒暑衝寒徧歷京畿興修水利俾數千里沮洳

之地變為膏腴數千年創始之規永為樂土此又畿輔
百萬耆民所涕泣而道之者也且王謙冲納善誠信交
孚其在戶部也則與大學士張廷玉蔣廷錫籌畫清釐
和衷共濟其營水田也則與大學士朱軾相度指示合
志同心諸臣有為國之憫王則深敬禮之諸臣有治事
之才王則若已有之待之以腹心親之如骨肉其他保
護善類推賢讓能之美筆不勝書此又舉朝賢大臣銘
諸肺腑寤寐弗諼者也八年以來王輔弼朕躬知無不

言言無不盡彰善癉惡樹之風聲內外大小臣工敬王之公服王之明感王之誠畏王之直無不感化漸摩洗心滌慮敦潔已奉公之義成大法小廉之風興賢育才崇文敷化此則吏治澄清而薄海士民無不被其澤者也至於教訓侍衛練習禁兵培養人才振興士氣俾將弁可備干城之選軍旅皆成義勇之師此又武備修明而內外戎行莫不收其效者也王之嘉言懿行鴻勳偉績人則知其大概而不能悉其全朕則全知之而亦不

能備舉也王應運而興歸全而逝古稱聰明正直之謂神詩經曰維嶽降神生甫及申莊子曰傳說乘東維騎箕尾而比於列星然則王之靈爽在天千秋不泯更復何疑國家崇報之典已仿古人書於太常祭於大烝之禮特命配享

太廟而天下官民感王之恩慕王之德者莫由展其焚香報享之忱則於禮有闕而於情未申然朕未降諭旨則又不敢舉行昔潮人奉韓愈之教於其歿也飲食必祭水

旱疾疫凡有求必禱焉然則王之遺愛在人動人思慕而仙靈之福國佑民有禱必應者豈不更駕於韓愈哉著通行內外直省有欲為王建立祠宇歲時展祀者著奏聞准其舉行或塑遺像或設神牌聽之其不能深知王之功德者不必行若隨衆從事而不出於誠心則是獲罪於王吾弟神明亦必不享也若有存迎合之心勉強從事者朕訪聞得知必嚴加治罪朕御極以來為世道人心計懲奸鋤暴用法不得不嚴而心懷悖逆之徒

滅絕天良遂視朕為仇敵近日敗露者已屢見之矣但朕非出於不知而無意為之者將來怡親王建祠之後或怨朕之人不得逞其志而遷借於王以洩悖逆之私忿妄生謗議暗事摧殘者必有之然此皆與朕為梗於王無與也若朕萬年後吾弟之隆盛功德百世流芳愈久愈能彰顯處朕可預信之特諭

雍正八年六月十六日奉

上諭吾弟怡親王之事朕無一念不出於至誠無一事不

本於至敬即如朕之壽日節辰吾弟所獻之物甚屬豐腆皆吾弟經年累月經營預備親自選擇掄點以表其誠敬之心無一件肯草率充數者凡朕偶賜王之金銀多為購買進物之費朕賞王永壽揚州鹽窩一處王即以每年所得之息皆付商人精細者為製辦之資務期精好周備而後慊於懷朕見吾弟之心如此實不忍却而不受是以每年凡吾弟所進之物朕悉皆收納另置一處亦不忍與朕常用之物及衆人進獻之物同類而

觀用也今吾弟仙逝矣朕若送還王之子則負弟當日之本意若朕常時觀覽不但觸目傷懷更增悲感實不忍其棄壞因另貯一處著總管太監等記明擋冊永誌吾弟誠敬之心俾將來子孫宮中人等見之知吾弟之事朕即此小節恭敬慎重至於如此則其為國為民贊朕治平天下之大者其殫心竭力更可想見矣倘有無知之人見王進獻如此之豐或以王為有心諂媚或以為朕之嘉獎王者在此又或以為王受人餽贈蓄積富

饒此皆卑鄙庸愚小人之見不知朕與吾弟者也王之
事朕朕之獎王者皆在一片誠敬之心豈在儀物之豐
美精多耶至於吾弟之操守實為一塵不染古今罕有
比倫其所屬人員凡有進啟王之書札物件一物一字
皆不相隱呈送朕覽將物件必求朕擇而收之朕留一
二其餘發出者王仍給還本人一無所受其字啟呈進
朕覽處亦不令一人知之又如朕每年加賞親王俸一
萬兩吾弟悉封貯未動遺言囑其福金及諸子曰皇上

所賞當舖及我之產業已足敷爾等之用此歷年所賞俸銀可仍舊繳進以備皇上賞賚之需此吾弟在日遺言昨仙逝後王府人始奏朕知之吾弟於朕賞賜應得之俸祿尚節儉而不用其於他人一絲一粟不肯收取處朕知之最確亦衆所共知者況王之身後並無私蓄亦無餘貲其所有者多係朕賜賚之物及所賞之當舖與王當日原有之薄產而已即此節豈常人所能者耶此等事目今之人尚不能深知何況傳之將來朕不得

不舉其大概書此諭旨永留宮中俾世世子孫共知之
特諭

雍正八年六月十七日奉

上諭昨朕欲親奠怡親王殯所而諸大臣等以天氣溽暑
再三懇求朕勉允所請暫停親往但恐諸臣疑朕悲戚
思念之衷於情禮太過特宣諭使共知之朕生平讀先
聖之書遵

皇考之諭不敢因情廢禮亦不能以禮遏情惟本於心之公

發於心之誠孚於衆論之同合於三代之直此即先王
之所謂緣人情而制禮情之所當盡即為禮之所必不
可缺者也如朕之兄弟多矣阿其那非以弟而封親王
者乎淳親王非以弟而封親王者乎怡親王非以弟而
封親王者乎而朕之待之也則有霄壤之不同有輕重
之差等是非朕有意區別於其間也皆視乎其人之自
取耳如阿其那者潛蓄異志包藏禍心要結僉壬擾亂
國政不計

宗社之利害不顧

皇考之是非但思逞其邪謀遂其私願此實國家之仇讐四海臣民之蠹賊也如淳親王者則閉戶安居識分知足宗親中之無功無過者也如怡親王者才識超羣忠誠貫日夙興夜寐恒思寰海之乂安佐政宣猷惟恐民生之失所凡顯著於中外與密陳於朕前皆裨益於軍國之大計治平之遠圖此乃

天

祖

皇考篤生此不世出之名賢以輔佐我邦家者豈歷代所稱
賢王宗子可同日而語哉朕常諭諸大臣曰凡我臣工
果能為國為民抒忠宣力俾朕克繼

皇考之遺緒不墜

皇考之令名則有功於朕躬者即有功於

皇考者也有功於

皇考者即有恩於朕躬者也此等之人朕自加恩以報之若

懷挾奸私紊亂治體使朕躬有不令之名以致上累

皇考知人之哲啟千秋萬世之譏評則其人之罪通於天矣
豈可擢髮數哉是以阿其那視

皇考朕躬如仇敵朕亦只得以仇敵視之淳親王不失為臣
為弟之道朕自以親王昆弟之禮待之至於怡親王勳
在

社稷澤被萬民其輔弼朕躬以繼述鴻業成太平之績者皆
大有功於

列祖

皇考者也然則朕念王之情曷有止極報王之禮豈尋常定制所得拘哉孔子曰天之生物必因其材而篤焉故栽培者培之傾者覆之此即天命有德天討有罪之謂可知賞罰之輕重非人主所得私也孔子又云以直報怨以德報德此就已身之恩怨而言尚且如此何況關係宗社國家之重而乃賞罰不明是非倒置豈不違背乎天命天討之正而獲罪於

祖

考哉怡親王之實蹟如此朕之公心如此若有人以私鄙之見妄議謂朕以偏溺之情欲加恩於王而粉飾揄揚其美善者此小人之誤論也又或以為朕借王之美善而有意逾格加恩歟點禮節以博友愛之名者此更儉邪之謬議也朕之公心合乎情理之至當而不容已惟

天

祖

皇考實鑒之著將此旨曉諭中外咸使聞知特諭

雍正八年六月十九日內閣會同宗人府將怡親王
謚號應加之字謹擬具奏奉

上諭怡親王謚號著用賢字康熙六十一年十一月廷臣
恭擬

皇考聖祖仁皇帝尊謚朕刺指血濡筆恭定今吾弟怡親王
謚號朕滴淚研硃以定將此並諭諸王大臣等知之特
諭

雍正八年六月二十四日大學士馬齊等奏稱怡親王應行厚葬典禮奉

上諭怡親王有遺言身後殯殮只用常服一切金玉珠寶之屬概不可用福金及諸子遵其遺言只以常服為殮即平日所束之帶亦未曾用朕親臨其喪亦祇以血淚巾帕及所佩香囊附棺中示含玉之意誌永訣之哀蓋王天性節儉一生服食之需愛惜物力不肯多費絲粟故拳拳於身後如此且識見高明深凜古人寶玉送死

之戒即此一節其器量過人遠矣是以附身附棺之物
皆從其遺言不忍違其素志至於園寢之制則關係國
家之典禮德懋懋官功懋懋賞乃古今之通義恐非朕
所得私亦非王所可讓者今大學士九卿等酌古準今
詳明定議悉與典禮符合甚愜朕懷著依議行朕原擬
不動戶部國帑而以内庫銀兩為興造園寢之費細思
內庫銀兩亦民間之膏脂也王生平以節用愛民為心
朕深知之今體其心即內庫之項亦不動支朕在藩邸

數十年仰賴

皇考福廕尚有餘資即以藩邸存剩銀兩為王園寢一切工程之用將此并諭中外知之特諭

雍正八年六月二十八日奉

上諭怡親王第三子弘曠朕指配傅察氏尚未婚娶而弘曠病故傅察氏聞信即慟哭截髮至王府懇求持服守制彼時怡親王不允傅察氏於門外跪哭以夜繼日王始終未允并未遣人與彼一語王之意以王子已故不

忍再誤傅察氏之終身是以為此忍情之舉以謝絕其
心也乃傅察氏歸至母家持服守節二年以來之死靡
他今年吾弟仙逝傅察氏又至王門悲慟啣哀懇求服
孝從前之事吾弟並未奏聞至此時王之管事人員以
應否准其服孝奏請朕始知之遂降旨准伊服孝令進
王府諭福金收以為媳傅察氏以幼年之女能知大義
矢志柏舟其情可憫其行可嘉弘曠身後一應禮儀俱
照貝勒之例著於弘曠親姪內以一人為弘曠之嗣即

襲封貝勒令傅察氏撫養俾其無子而有子以彰節女之厚報焉特諭

雍正八年六月二十九日奉

上諭尚書舜典云欽哉欽哉惟刑之恤哉朱子曰所謂欽恤者欲其詳審曲直今有罪者不得免而無罪者不濫刑也吾弟怡賢親王嘗奏朕云今法司衙門凡有審問事件並不究其情之虛實動以夾訊夫聽斷之下求之於辭氣耳目以察其情設誠以待之據理以鞫之未有

不得其實者何庸夾訊倘有証佐確據情罪顯著而本
犯猶狡獪不以實供則不得已而用刑若並不詳鞫其
情而概用重刑嚴訊三木之下何求不得此重案之未
免有冤抑牽累也吾弟之言如此是以八年來凡朕交
王承審數十件繁難大案皆以誠敬用心以情理感格
愚頑簡孚閱實俾各自將罪犯委曲招吐從未曾夾訊
榜楚一人而諸案情罪無不允當吾弟之存心忠厚如
此凡為法司者皆當奉以為法也今外省有司既不能

聽辨五辭無明決折獄之才每遇重大案件至限期將滿之時慮及處分則連用重刑該犯欲緩須臾之命凡官吏訊問之語靡不承認遂據其供招鍛鍊成獄且凡遇命盜案件其中牽連之人有司亦明知其無辜而欲為開釋恐致上司之翻駁遂有非夾訊不能歸結之論夫欲保全一己之功名彌縫上司之查駁無論情之虛實罪之輕重輒用三木以訊每致未結而有刑斃之人此其居心尚可問乎從前阿爾松阿為刑部時不能剖

斷曲直乃各將原被告之一足共一三木此天良喪盡
之人視夾訊為兒戲其心之殘忍慘毒甚矣未幾而身
為叛逆不能保其首領善惡之報施其有爽乎吾弟怡
賢親王存心仁恕固不待言而其本懷總不欲使天下
有一冤抑之人俾國家受濫刑之議此其忠君愛國之
心出於誠懇篤摯是以凡有聽斷歸乎至當能使羣議
帖服刑章式敘也今吾弟仙逝之後凡啟靈大祀之日
上天必賜以清和景象而羣工黎庶各致其哀慕深情成一

千古以來未有之賢王此

天之報吾弟亦云厚矣吾弟嘉謨入告之事不可勝數偶因戒飭問官輕用三木一節將吾弟數奏之言宣示於衆且布告各省有司令咸以吾弟怡賢親王之聽訟居心奉為按鞠之規範則明慎用刑庶幾咸中有慶矣著凡掌刑名衙門將此諭刊榜永示於堂署特諭

雍正八年六月三十日奉

上諭前江寧織造郎中隋赫德具摺奏稱本年六月初一

日日食之期江寧地方先期陰雨至午後則天色晴明
萬目共見日光無虧地方咸以為瑞特行奏賀等語朕
此時即批諭切責隋赫德此並非爾職掌應奏之事且
以識見庸鄙之人而輕言天象尤屬誕妄又見山西巡
撫石麟本章奏稱太原等處日食之期濃雲密雨未見
虧蝕官民紳士均頌希逢等語朕亦降旨切加申飭矣
從來天象之灾祥由於人事之得失若

上天嘉佑而示以休徵蓋欲人之知所黽勉永保令善於弗

替也若

上天譴責而示以咎徵蓋欲人之知所恐懼痛加修省於將來也凡為人者受

天嘉佑而或驕矜縱肆怠情前修則將轉福為灾矣受

天譴責而或戒慎悚惕省改前愆則將化灾為福矣此天人感應呼吸相通之理朕所日日訓示天下臣民者况

天之錫福降灾即如人君之賞罰也凡為臣者受賞一次則終身當有感激奮勉之心受罰一次則終身當有儆惕

抱愧之意安有遇賞而感遇罰而懼過後即淡漠置之
俟再賞再罰之時而後知感知懼者乎雍正八年六月初一日之日食乃

上天垂象以示儆所當永遠敬畏勿忘兢業之心詎可以偶爾觀瞻之不顯而遂誇張以稱賀乎山西地方偶值陰雨不可以概天下至隋赫德所稱江南日光不見虧缺朕推求其故蓋日光外向過午之後已是漸次復圓之時所虧只二三分是以不顯虧缺之象昔年遇日食四

五分之時日光照耀難以仰視

皇考親率朕同諸兄弟在乾清宮用千里鏡四週用夾紙遮蔽日光然後看出考驗所虧分數此朕身經試驗者若果虧蝕不及分數則係欽天監推算之誤又豈可因此而怠忽

天戒稍存縱肆之心乎康熙三十六年二月初一日日食是時我

皇考降旨日食雖人可預算然自古帝王皆因此而戒懼蓋

所以敬天變修人事也若庸主則諉諸氣數矣去年水潦地震今又日食意必陰盛所致豈可謂無與人事乎可諭九卿如有人事應修改者悉行奏聞

皇考敬

天之心誠切如此是以

上天眷佑本年即成蕩平噶爾丹之大功邊方寧謐中外歡騰此即轉災為福之明徵也又康熙五十八年正月初一日日食

皇考在宮敬謹齋肅

特命朕同諸王子赴禮部衙門虔誠禮拜是日陰雲微雪未

曾顯見

皇考諭廷臣曰京師雖未曾見別省無雲之處必有見者況
日值三始人事不可不謹或有缺失之處諸臣應商酌確
議此皆我

皇考之垂訓子孫臣民者今見外省臣工中有因今年日食
不顯而生欣喜之心為慶賀之奏者甚屬非理大違朕

心特諄切宣諭俾中外臣民共知之特諭

雍正八年七月初五日奉

上諭武藝者乃滿洲之根本要務八旗管轄兵丁之大臣
官員理宜操練武藝習勞苦耐寒暑以及疾趨超距撲
跌等技近觀大臣官員侍衛等值班俱不親佩腰刀令
家人持攜及至紫禁城內方行親佩似此一味偷安總
不操練服習勞苦成何道理即如吳達納係由盛京兵
丁選取侍衛之人差往打牲烏拉地方逸居一載遂至

跟轎一班即喘息不能行走來文原在執事人行行走曾
經服習勞苦之人今年僅五旬竟不能跟轎哈岱在侍
衛執事人行走多年出征隨圍俱經身歷至跟轎一班
亦不能行走此皆自圖安逸之所致也大臣官員若不
於平素間服習勞苦倘至緊要處不能爭先將使兵丁
竟捨伊等前進乎抑停留等待乎且至彼時力不能支
即懷奮勇之心亦屬無用若此何能使兵丁精銳耶從
前

皇考時常行圍衆人得以學習技勇未致廢棄俱能服習勞苦及朕即位仰思

皇考付託之重八年以來勵精圖治未及巡幸郊外近觀武職大臣侍衛官員兵丁漸不及前若不嚴令學習勢必流於不堪任用嗣後八旗武職大臣官員及各省駐防之武職大臣官員年未至五十五歲者勒限半年令各奮力學習一切技勇若仍有自圖安逸不肯學習稍有所勞即至汗流不止一遇寒冷臂指拘攣不能張弓毫

無技藝不耐勞苦者或經朕調來引見或經朕行幸時查出必重加懲治責革照違旨例治罪斷不寬宥彼時莫怨朕不預先曉諭也如有學而不能者准其告退將此通行八旗併各省駐防武職大臣侍衛官員等知之特諭

雍正八年七月初八日奉

上諭各省文武諸臣奏摺經朕硃筆批示者俱令呈繳以備稽查但向來未定呈繳之期以致各員遲早不一有

二三月後乘便恭繳者有於年底彙齊呈繳者夫既奉
硃批查辦此事下次查辦具奏之時即應將硃批原摺
呈繳以備朕之檢閱若具奏此事而仍留硃批原摺於
外則朕處無檔案可稽且朕日理萬幾於各案之原委
豈能一一詳記不見原批之摺未免難於辦理諸臣中
如嵇曾筠石雲倬等數人往往如此著通行曉諭凡接
到硃批者仍照舊乘便恭繳不必專遣人來若具奏此
事應將原批一併呈進勿待數月之後如所批查辦之

事尚未就緒准將硃批存留俟辦理具奏之時一同呈繳特諭

雍正八年七月初八日奉

上諭朕令武職大臣侍衛官員等學習技藝所降諭旨著通傳八旗各省凡有管轄兵弁之處令其刊刷於值班之處及會集公所俱行實貼再每人付與一張令其加意熟讀若值朕詢及有不能記憶者定行從重治罪特諭

雍正八年七月初十日奉

上諭國家効忠宣力之臣勲績茂著必膺崇報之典令其
世享烝嘗雍正二年朕已勅建昭忠寺自開國以來致
命立功盡忠報國之儔皆得春秋妥侑世世血食顧念
古者大烝之祭凡法施於民以勞定國者皆得並列祀
典永受明禋則我朝名臣良弼其經邦佐治黼黻昇平
者皆祭法所必登朕欲為之建立祠宇久矣即如怡親
王之精白一心忠誠體國勲在

社稷澤被生民其功德隆盛又豈一切効忠宣力者之所可比倫乎洪惟

太祖

太宗創業垂統厥有一德佐命之良

世祖撫綏萬邦實多奮庸熙載之彥迨我

聖祖臨御六十餘年其間良臣碩輔後先相望據朕所深知者舉其一二如大學士公圖海公賴塔大學士張英尚書顧八代馬爾漢趙申喬河道總督靳輔齊蘇勒總督

楊宗仁巡撫陳瓚等持躬正直奉職公忠或垂節鉞之
勳或勵冰霜之節俯仰無愧為朝野所共欽終始不渝
無瑕疵之可指似此等靖共爾位不愧古大臣之風者
正不乏人既樹羽儀於一世宜隆俎豆於千秋且使世
世為臣者觀感奮發知所慕效羣以臯夔稷契共相期
待則明良喜起之盛朕於斯有厚望焉著於京城內白
馬關帝廟之旁選擇吉地特建廟宇命名賢良祠春秋
以時展祀其應入祠之員著內閣會同該部確查本朝

滿漢文武大臣才德著聞完名全節者詳慎開列具奏
請旨將來繼起之臣亦併得沾被恩光永為盛典特諭
雍正八年八月十五日奉

上諭吾弟怡賢親王之事朕躬至誠至敬翊贊勛襄裨益
於

宗社國家民生吏治者功勳懋著自古罕有比倫而其忠愛
朕躬之心肫誠篤摯出於至性更有非言詞稱述所能
宣者朕即加恩沛澤於常格之外究不能展朕崇德酬

庸寤寐追思之念也吾弟之子幹珠耳著襲封怡親王
世世相承永遠勿替凡朕加於吾弟之恩典後代子孫
不可任意稍減佐領屬下等項亦不可那移更改一二
再者朕於雍正三年春以怡賢親王總理事務恪恭抒
藎夙夜勤勞曾降諭旨於王諸子之中再封一郡王以
昭恩獎比時王再四懇辭情詞諄切朕不得已勉從所
請成其謙讓之美今吾弟仙逝朕追想遺徽中心輟轉
在賢王有必應加之禮在朕衷有實難已之情雖與吾

弟素願相違朕亦不遑顧惜弘皎著封為郡王世襲罔替所有襲封親王冊封郡王應行典禮該部察例具奏特諭

雍正八年八月十八日和碩莊親王允祿等為

聖主勤民之德上格

皇穹河神瑞應之徵光昭雲漢恭抒賀悃以慶殊祥事具奏奉

上諭王大臣等以河州地方黃河澄清合詞奏賀朕從來

不言祥瑞諒王大臣等久已深知朕心朕之祇事

上帝神明惟以公誠一念為昭格之本果蒙

上天垂鑒頻年顯示嘉祥觀公誠之感通神捷如此則懷不
公不誠之心者豈能逃於

上天之譴責乎朕心不但不敢矜誇且因此倍加乾惕更願
天下臣工士庶各夫公誠之念以受

上天之恩著照王大臣等所請宣付史館俾世世子孫臣民
恪遵朕訓以綿福澤特諭

雍正八年八月二十六日奉

上諭數年以來遵化州

陵寢附近之地方雨暘時若年穀順成今年春月畿輔微覺
亢旱而遵化等處則雨澤調勻民人樂業六月日食之
期

陵寢地方則陰雨不見本月十九日京師地動朕繫念

山陵憂勞寤寐星遣侍衛等馳往看視今據差回人員及守

護

陵寢之王大臣等奏稱十九日地覺微動較他處似更輕村舍
墻垣悉皆無恙居民竟有未經知覺者朕以手加額五
內歡欣益見我

皇考之聖德神功蟠天際地受眷佑於

上帝貽福慶於蒼生若此之彰明較著也朕感

上帝之慈思念

皇考之功德特將近事之顯而可見者曉諭諸王大臣九卿
等共知之特諭

雍正八年八月三十日奉

上諭京師於八月十九日地震朕恐懼修省感激

上天垂象示儆之恩倍切乾惕今年各直省收成頗好而其
中又各有被水澇溢之處該省督撫大臣往往引過自
責朕即批示并宣諭左右大臣曰此非臣工之咎其過
實在朕躬蓋今年春夏以來朕體中違和仰惟

宗社攸關

列祖

皇考付託之重不敢不保護此身是以屏除思慮葆靜頤養而勤政敬事之心實不及平時又因吾弟怡賢親王仙逝朕心悲痛有傷

天和遂致水滂情形見於數省朕深知其由不肯卸責於臣工而為大臣者但當撫躬自問或有干涉招致之處則默加省察以凜

天戒不在引過之虛文此朕從前曉諭臣工者目今又有地震之異實因朕躬違和不能勤敬如前仰蒙

上天垂慈顯示儆戒惟有夙夜祇懼切加省改以戴

天恩除兵民人等屋宇傾圯者一一查賞外用將朕心曉諭
內外臣民共知之特諭

雍正八年九月初六日奉

上諭近因朕躬初愈諸大臣等見朕萬幾甚繁奏請節勞
顧養朕因憶吾弟怡賢親王在日八年以來誠心協贊
代朕辦理之處不可悉數從前與吾弟閒談中每常奏
云聖躬關係

宗社至為重大凡臣工可以辦理者皆當竭誠宣力以代聖躬之勞臣心實願將已之年齡進獻以增益聖壽朕比時聞之深為不悅以此言為非今日回思吾弟八年之中輔弼劬瘁夙夜匪懈未必不因勞心殫力之故傷損精神以致享年不永且即以人事論之吾弟費八年之心血朕得省八年之心血此即默默以弟之壽算增益於朕躬矣其理易明其事甚顯此皆廷臣所不知者偶因感觸將此宣諭知之特諭

雍正八年九月二十一日奉

上諭今年八月十九日地動朕心恐懼修省以凜

天戒並將夏秋以來朕躬調攝不能勤敬如前以致上干

天和引過自責曉諭天下今經一月矣地氣尚未全寧或日

或夜尚微動一二次昨又兩次值陰雨朕軫念露處之

民痼瘼乃身未嘗不願與之共此苦也惟是天地之災

祥皆由於人心之感召朱子曰吾之心正而天地之心

亦正吾之氣順而萬物之氣亦順然則天地之心安有

不正者其或有不正乃從人心之所感天地豈有降災
與人之理也尚書曰作善降之百祥作不善降之百殃
善惡之報如影隨形是人人有感格天地錫福降災之
理遇災而懼上下貴賤當同此心是顯而易見之理不
可全諉諸人君一身而各置已身於局外也八月十九
日地動之先朕無意登舟臨時全未受驚即既動之後
城內宮中及圓明園宮眷子孫長幼內外侍從數百人
悉皆安吉豈非

上天於垂象示儆之中仍賜護佑非降責朕一人之明徵耶
今者地動之象久而未定雖當日曾經

皇考訓諭曰大動之後必有微動康熙十八年亦動至一月
有餘又曾見書籍記載明成化時地動至二十三日是
地動經月之久亦向來之所有者然處修人事以轉移
天心必須君臣上下各殫其誠惴朕身居帳幕之中寤寐悚
惕寢食靡寧者已一月有餘矣凡大臣官員士庶兵丁
等存心之敬肆與否朕則不能悉知但恐不知返躬自

責而或生怨天尤人之念者未必無人且聞貿易工匠之流將日用必需興作必用之物勒索高價乘人於危以圖厚利甚至有兇惡之徒窺伺頽垣而入室盜取財物者人心無良若此而欲不遭

上天之罪譴其可得乎此雖市井無賴小人之所為不可概論而居官讀書之人亦未必事事可以問心而無愧用是特頒此旨願爾大臣官員士庶兵丁等人人當誠心感激

上天示儆之深恩返來自問思過省愆不但惡事邪念急宜掃除即怨尤抑鬱之心亦當屏絕若房舍傾圯無可棲身則思人口平安乃

上天之恩也若人口稍有傷損則思已身無恙乃

上天之恩也即如日來陰雨固不便於露處之人未嘗不大有益於農田之戶此亦

上天之恩也果能如此存心則

天高聽卑必垂照察不但地方寧靜共獲安居且可永免

上帝之譴責斷無再罹險厄之虞也朕非以地動之異卸責於臣工黎庶也朕之生平先責已而後責人先自勉而後共勉願天下臣民共知朕心特諭

雍正八年十月初三日奉

上諭從前吾弟怡賢親王為太平峪吉地事宜殫心竭力區畫經營曾與高其倬等定為癸山丁向今年高其倬來京又復細加相度觀朝案之確情察砂水之深蘊應立為壬山丙向又吾弟怡賢親王在日曾有於金圈後

面酌留氣土之說今據高其倬等再三計議若留氣土一肢旁鑲磚石與土不能合一其界縫之間陽水滲入轉為未協夫氣之所至金石莫間陽燧取火方諸取水水在盤而外津薪隔釜而內熟或由虛而達或隔物而通乃其明驗龍吉氣旺無所不徹無庸又留氣土應循規制建造等語覽高其倬等所奏於形勢理氣計度周詳研求精細講論之處甚為明晰吾弟當日之經理此事惟期合理合局並無成見成心且遜志虛公謙懷受

益其生平之令德如此高其倬等今日之議既較前議更為加善吾弟若親身辦理自必欣然樂從即今日仙靈聞之亦必大為喜慰也著於月祭之時將此情節告於仙靈知之特諭

雍正八年十一月初三日奉


上諭從前官員等每年穿蟒衣之期元旦萬壽節則穿七日上元節則穿三日後因履郡王允禩管理禮部事務奏請各增二日朕亦以為無甚關係降旨允行并諭令

不必定穿蟒服即補服亦可近見大小官員未有止穿補服者夫蟒袍乃華燦之服組織匪易衣著之日太多非愛惜物力之道嗣後元旦萬壽節仍穿蟒衣七日上元節仍穿三日著內外一體遵行特諭

雍正八年十一月二十五日奉

上諭凡朕降旨特交事件該衙門有即行辦理者亦有遲久尚未辦理者總因無專司稽察督催之人是以遲速不齊間有耽延嗣後著於滿漢文武大臣內派出數人

管理欽奉上諭事件專任稽查督催之責於事務大有裨益其滿司官即用議政處辦事之員漢司官著派出之大臣等揀選委用特諭



世宗憲皇帝上諭八旗卷八